

# Sa lavurar en avant che decider e disponer

CUN IL NOV UVESTG DA CUIRA AMÉDÉE GRAB HA GIUSEP CAPAUL DISCURRI

■ Ditg hai cuzzà fin ch'igl è stà pussaivel da chattar il termin per in discurs cun il nov chau diocesan, Amédée Grab, sco ch'ins era sa cunvegna il di da sia installaziun ils 23 d'avust a Cuira. L'agenda d'uestg Grab – el è er anc president da la Conferenza episcopala svizra – è gia bain plaina. Finalmain è la chaschun sa dada a Mustér.

**Vus avais ordinà ils 12 da settember in confrar benedictin da la claustra da Mustér sco spiritual. È quai stà Vossa emprima funcziun uffiziala sco uestg da Cuira en Surselva?**

Amédée Grab: I constat che jau hai absolvi mia emprima funcziun uffiziala en Surselva cun ordinar pader Jean-Marie Freysco spiritual. Avant trais onns hai jau benedi ora pader Vigeli Monn. Da lez temp er'jau anc uestg auxiliari da Geneva. Ils 29 d'avust 1998 hai jau pudì assister a l'avertura da l'exposiziun ambulanta «La Bibla en Svizra» a Glion.

**Per l'uestg da Cuira è vegnids ordinads quest onn en tut dudisch spirituals, furmads e scolads en il Lauretanum a Zezas ed en il Seminari da spirituals a Cuira. Vegnis Vos a cuntinuar cun questa scolaziun da spirituals sut il dispaivel regens pader Peter Rutz?**

Da principi vegn quai cuntinuà. I sa tracta da la via che la Baselia catolica vul per furmar ses spirituals. Igl è zunt impurtant e necessari ch'els possian sa preparar en in seminari per lur clamada. Perquai duai questa cuminanza sa cumponer be da futurs spirituals. Quests duajan dentant avair durant lur scolaziun stretg contact cun tuts quels che collavureschan pli tard cun en la pastoraziun. Il regens giuda mia confidenza. Malgrad quai pon ins discutir. Nagin n'è elegi regens per vita duranta.


## En il seminari tutgan be futurs spirituals

**Tge muntada principala dais Vos a la scolaziun dals spirituals e co quintais Vos da vegnir dominè a la precara situaziun pastorala en consequenza da la mancanza da plevons?**

Qua sa tracti per ina chausa centrala che pertutga tuts uestgs svizzers ch'èn era s'exprimids a scrit en quai grà avant insaquants mais. Ins sto tshertgar vias per schliar quest problem pesant. La baselia sto far tut il pussaivel per survegner novs spirituals. Cun quai na vulain nus tuttavia betg svalitar il pensum da teologas e teologs laics. Els prestan oz servetschs fitg prezios. Dentant èsi in fatg che be in spiritual po remplazzar in spiritual ed ademplir ses servetsch.

**Cun mintga midada sin la sedia episcopala è mutaziuns tar ils uffizis da clav d'ina diocesa colliadas. Tge succedi en quest regard a Cuira?**

Il mument n'è questa dumonda betg actuala. Jau stoi pir m'introducir en la situaziun da mes nov uestg. Perquai sun jau fitg engraziavel per l'accoglientscha cordiala da tut mes stretgs collavurats e da pudair profitar da lur vasta experientscha. Els han invista concreta en las diversas spartas. Ma cun il temp èsi tuttavia betg d'exclauder ch'i dettia mutaziuns personalas.



Amédée Grab, il nov uestg da Cuira.

FOTO T. DEFILLA

**Vus avais surpiglià il nov uffizi ils 23 d'avust cun ils pleds biblics: «Na hajas betg tema» e cun l'appel dal papa «Avri las portas al Segner». N'avais Vos davairas betg temi da surpigliar la direziun da la diocesa da Cuira suenter in decenni da tants grevs embrugs?**

Na, tema n'haja jau gi nagina, dentant fatg quitads che questa incarica na ma reusseschia betg. Jau quintel dentant fitg cun l'agid da Dieu.

## Prender temp per tuts engaschads

**Vus avais annunzià tar l'installaziun dad esser oravant tut pastur da las olmas. Tge vulais Vos cun quai concretamain?**

L'uestg na dastga betg sulet s'occupar cun l'administraziun, tgamunar ed assister a sesidas e sutscrivere decreti. Jau vuless surtut m'entupar cun ils spirituals, cun bleras plaivs, cun teologas e teologs laics engaschads en la pastoraziun per parter cun els quitads e diffcultads per esser manivel al pled divin.

**Vus essas vegni elegi en l'emprim scrutini tras il chapitel catedral sco uestg da Cuira e confermà spert dal papa. Questa tscherna ha chattà grond entusiassem e Vos avais retschavi ordavant bleras arbajas. Tge munta quai per Vos ed èsi davairas avunda per schliar ils grevs problems?**

La buna accoglientscha è davairas in agid bainvegna per schliar las grevas dumondas. Jau poss quintar cun la bainvulentscha da blers ch'èn pronti da m'accompagnar. Quai sustegn, ch'è sta

## Jau sper ch'ils entusiasms na vegnian betg trumpads

nunspitadamain grond, ha dentant era dà da pensar. Sche tut na duess betg ir sco quai ch'ins spetga e spera, alura èn ins trumpà. Ma sche l'uestg e l'uestg quintan era cun l'agid da Dieu, è tut schliabel. Be l'entusiassem consideresch jau schizunt per privlus.

**In dals pli pesants problems pudess la**

**pacificaziun u silmain l'avischinaziun tranter ils aderents ed adversaris da l'anterior uestg Wolfgang Haas esser. Quai ha probabel anc consequenzas cuzzantas. Co vesais Vos quai?**

Jau na vi betg tatgar en fruntalmain quest problem. I dat davairas domaduas varts. Jau crai dentant che reconciliaziun, perdunament ed ina nova entschatta duessan esser pussaivels, siond che la persuna da mes antecessur è daventada il center da tensiuns che n'eran betg da gener personal, mabain da natura principala. Insaco vegnan quests problems perquai puspè a sa mussar.

**Vus avais surpiglià cun 68 onns in grev uffizi. Latiers essas Vos dapreschent anc president da la Conferenza dals uestgs svizzers. Il viceparura da questa, uestg Kurt Koch, n'ha tuttina betg vuli considerer Vos tar l'installaziun sco in «uestg transitoric». La Baselia sezza sa chattia numnadamain adina en transiziun. Voss parairi?**

Ins astga savair che jau sun en ina vegliadetgna, nua che blers èn gia en pensium. Mes temp d'uffizi vegn strusch a cuzzar pli che set onns. Schebain mia activitad episcopala va da ses cuntegn enna en l'istorgia sco in servetsch transitoric, u schebain insatge è vairamain

## Jau na sun betg sulet en la diocesa

succedi en quest temp, vegn il futur a mussar. Quai na po jau betg dir mez, pertgai ch'i na dependa betg suletmain da mai. La Baselia sa chatta adina sin via – e quai en in senn dubel: Ch'il Segner vegn encunter a nus sco als giuvnals d'Emmaus e che nus giain vers el sco pelegrins.

**Vus vegnis sustegni da dus uestgs auxiliars: Peter Henrici, a Turitg e Paul Vollmar, a Cuira. Vegnan domadus a mantegnair era lur uffizis sco vicaris generals – quai che n'è en sa sez betg usità?**

L'uestg diocesan sto – tenor il concil – nominar ses uestgs auxiliars sco vicaris generals u almain sco vicaris episcopals. Ma uschia disponan els da la giurisdicziun necessaria (per benedir e decider). Peter Henrici è cumpetent per ils chantuns da Turitg e Glaruna, Paul Vollmar per il Grischun, Uri, Sviz, Sur- e Sutsilvania.

**Vus essas il 99. uestg da Cuira ed il 7. da noss tschientaner e tgamunais pli probabel era la diocesa da Cuira, ch'è ina da las pli veglias da questa vart da las Alps ed il secund grond uestg da la Svizra, en il terz millenni. Tge munta quai per Vos?**

Ina gronda sfida che jau na vuless tuttavia betg bagatellisar. Ma jau ma sent purtà d'ina istorgia uschè veglia e d'in immens dumber da dunnas ed umens sogns, che han servi en noss uestg da Dieu. Era sun jau persuadi che nus n'essan mai separads da questa part da nossa Baselia ch'è gia transfigurada avant Dieu e ch'è da là anor in grond sustegn per nus.

## Cresmà en turnus da tschintg onns

**Fin avant diesch onns visitava l'uestg mintga tschintg onns tut las plaivs da sia diocesa e cresmava cun questa chaschun. Vegnis vos puspè a cuntinuar – suenter questa interrupziun deplorabla – cun la tradiziun u la delegais Vos?**

Las annunzias per cresmar 1999 èn gia uss uschè numerusas che la regularitad generala è exclausa per l'auter onn. Ins vegn a sa stentar da dar suatientscha als giavischs da las plaivs. Ensem cun il

## Midar be pervia da tschertas persunas n'è betg la politica da l'uestg

cussegl episcopal vuless jau dentant introducir davent da l'onn 2000 puspè il turnus da cresmar mintga tschintg onns en las plaivs, quai ch'era il cas normal gia dapi il Concil da Trident.

**Avant insaquants onns aveva la Baselia anc ina posiziun dominante en la societad. Oz – e quai avais Vos detgar l'installaziun – na spetgan numerus betg pli bler dad ella. I saja betg**

**decisiv, schebain ils tradizionalists u quests che pretendan prioritaramain in terz Vaticanum hajan raschun. Tge è alura essenzial?**

Essenziala è la fidaivladad da la Baselia a Jesus Cristus e ch'ella sa laschia tratter da el ora en il mund. Decisiv è che scadin cristian vivia sco giuvnal da Cristus e che la baselia sco tala exequeschia ed adempleschia sia missiun.

**Avais Vos in giavisch spezial ni tge schais a tals che spetgan da Vos spertas decisiv e midadas?**

Jau spetg dad els chapientscha per ch'jau possia sa lavurar en l'emprim e ch'ins sa damondia da cuminanza pertge ch'i duess dar ina midada e cun tge finamira. Be midar perquai che tschertas persunas n'èn betg d'engrà, na po betg esser la politica da l'uestg.

## Jau vi emprender rumantsch

**Sco sulet uestg svizzer essas Vos chau d'in uestg triling. Vos plidais pertgetudestg franzos e italian. Tar Vossa diocesa s'audan era Rumantschas e Rumantschs. Insaquants da Vos predecessurs, uschia era Voss confrar benedictin Caspar Willi, da Domat, eran Rumantschs. Tar Vossa installaziun avais Vos ditg insaquants pleds en rumantsch. Co statti tar Vos cul rumantsch?**

Jau al vuless emprender, ma i vegn dentant ad ir vess en mes onns. Perquai quentel jau cun la chapientscha dals Rumantschs. Dentant vegn jau adina a ma sa stentar da dir insaquants pleds rumantschs tar mintga funcziun uffiziala en terra rumantscha. Ad interim lasch jau anc translatar. Fin che jau poss sez formular in text rumantsch vai anc in pulit temp. Era manca la peda, siond fin il davos da l'onn 2000 president da la Conferenza episcopala svizra. Per quest onn èn previs en quai connex betg main che quater gronds viadis en l'exteriur (Finlanda, Jerusalem, Ucraina e Burgo-gna/Frontscha). Jau sper dentant dad avair temp en l'avium u en il tren da studiar la grammatica rumantscha. Ma dapli na poss jau betg empermetter.

## Ils uestgs da Cuira dal 20avel tschientaner

Uestg Amédée Grab è il 99avel chau diocesan da Cuira ed il 7avel da noss tschientaner. El vegn pia ad esser l'uestg diocesan tar la midada dal millenni. Sia giurisdicziun (intschess) cumpiglia la diocesa da Cuira per propi cun il Grischun, il chantun Sviz e la Val d'Ursera. Vitiers vegnan ils territoris da l'anteriura diocesa da Constanza che vegnan administrads apostolicamain dad el, numnadamain: Sur- e Sutsilvania, Glaruna, Turitg e parts dad Uri. Questa differenziaziun – tranter diocesa ed administraziun – è era vegnida numnada explicitamain en la bulla da nominaziun dal papa, prelegida tar l'installaziun d'uestg Grab a Cuira. L'uestg (diocesa plus administraziun) da Cuira cumpiglia ca. 700 000 catolicas e catolics ed è il segund grond da la Svizra (suenter Basilea).

### Siat uestgs

Da 1888 fin 1908 – pia a l'entschatta da noss secul – è Gion Fidel Battaglia, in Surseter da Paronz, stà uestg da Cuira. Suandà è il trio sursilvan – tants en successiun n'ha questa regiun anc mai gi – cun Georgius Schmid de

Grüneck, Surrein/Cadi (1908–1932); Luregn Mattias Vincenz, Andiastr/Foppa (1932–1941) e Rest Giuseppe Caminada, Vrin/Lumnezia (1941–1962). Ses successur è stà Gion Vonderach, Spiringen/Uri/Medel (1962–1990), suandà da Wolfgang Haas, Mauren/Liechtenstein (1990–1998) ed Amédée Grab, da Sviz, dapi ils 23 d'avust 1998. En tut ha l'uestg pia gi quest tschientaner siat chaus diocesans, tuts burgais ord l'intschess da la diocesa. Il pli ditg – durant 28 onns – è Gion Vonderach stà uestg – il pli curt temp ses successur Wolfgang Haas (8 onns).

### Sis auxiliars

Uestgs auxiliars cul dretg da successiun (en concordanza cun il chapitel catedral – exceptà Haas) èn stads: Antonius Gisler, Uri (1929–1932), la vischnanca da Falera al aveva gia dà il dretg da burgais d'onur, ma el è mort avant che daventar uestg diocesan); Luregn Mattias Vincenz (1932); Gion Vonderach (1957–1962); Wolfgang Haas (1988–1990) e dapi 1993 èsi – senza il dretg da successiun: Peter Henrici, a Turitg, e Paul Vollmar, a Cuira.